

M212: Gedicht von der Siebenzahl

- 1,0 de septem . sigillis
 1,1 dô Johannes der bote was versant sô verre in des meres sant
 1,2 dô eroffenete ime diu . goteskraft die wunder alsô manicslaht .
 1,3 er sach ein buoch dâ geschriben . besigelet wâr iz mit insigelen siben .
 1,4 daz – nieman torste entsigelen . in erde . noch in himele .
 1,5 êr daz gotes lamp erslagen wart . daz+ erstênte ein lewe wart .
 1,6 daz hâte siben ougen daz eroffenete uns dise gotes tougene . ecce vicit leo
 de .
- 2,1 hier mit sigelen wir unser brust . wider die siben âkuste
 2,2 die gotes geist hât vertriben . mit sînen geben siben .
 2,3 disiu zal ist sô hêre . swâ der tiuvel . daz verkêre .
 2,4 der quît daz der gelogen habe . der dir von siben iuweht gesage .
 2,5 sô vînt ist er dirre zale si verjaget in ûz dem gotes sale .
 2,6 vore ôsteren in siben scrutiniûs . mitsam manigen sacramentûs .
- 3,1 in dirre siben gewage . segenete – got dem sibenden tage
 3,2 in sehnen habet er vûre brâht . sîniu werc sô manicslaht .
 3,3 er ruowet in dem selbem tage . in dem slief er sît in deme grabe .
 3,4 sehs alter weret uns dirre lîp . in deme sibenden rastet man joch wîp .
 3,5 daz sint sibene süne Jobes . zwire sibene jâr Jakobes .
 3,6 in den er verdiente . zwêne wîp . daz bezeichnenet unsern zwischen lîp .
- 4,1 dô diu siben horn klungen . dâ mit wart Jericho gewonnen .
 4,2 si giengen dâr umbe siben stunte dô viel diu mûre sâ ze stunt .
 4,3 diu burc was diu heidenschaft di erwaht des hêren geisteschaft .
 4,4 er blies ir zuo mit sînen geben . si muose wandelen ze ire lebene .
 4,5 der boten lêr – si umbe gienc . mit zeichene wundere si si vienc .
 4,6 daz sint engele sibene von den – hât geschriben . aprehendent septem .
 mulieres . virum . unum .
- 5,1 alsô der wîssage quît . begreifen schulen ein man siben wîp
 5,2 einen man algemeine . vernemet wâr er daz meine .
 5,3 daz sîn sibene kristenheite eine . daz wâren siben ougen nâhe eineme steine
 .
 5,4 unde siben lichtvaz . sô uns zel der hêre Zacharias .
 5,5 unde die siben lichtsterrn . in der zesewen des hêren .
 5,6 unde siben horn des lambes . dannen schrîbet sanctus Johannes .

- 6,1 sô hier bevore die Israelite . begiengen . ire ôsterliche zîte .
6,2 si dulten si alle siben tage . kiusches mazzes danne gevage .
6,3 sie âzen alle brôt . unerhaben . si ne scholten . übele niht haben
6,4 diu übele sûret daz muot . same der hebele den teic tuot
6,5 wilder latech . was ouch ire maz . der riuwe bittere zeigte daz
- 7,1 iemer an dem sibenden jâre . dô was wîlent jâr der râwe .
7,2 sô rastet erde joch der pfluoc . si hâten alle sus genuoc .
7,3 after siben stunten siben jâren . wie vrô danne arme unde rîche wâren .
7,4 der gekoufet schalc . gie vrîliche heim . dô ne was überal . gedwanc nechein
7,5 – hiez daz wûnejar . iz zeigte die wûne die wir hân .
7,6 in gedinge . nâch der gotes urstende . in hende nâch disses lîbes ende .
pater misericordiae .
- 8,1 nû biten wir den vater der genâden . daz er ruoche ze genâden .
8,2 der Pêtre ze dem êreste tete kunt daz er vergeben scholte . sibenzige siben
stunte .
8,3 hêrre dû der unser nôt weist . sende uns dînen sibenvalten geist .
8,4 der unser muot wîse . ze bitenne . daz dir gerîse .
8,5 in des kreften . sô ist der gewalt . ze verlâzen die sünde manicvalt .
8,6 der die riuwigen Marien trôste . durch sie von den siben tiuvelen lôste .